

Diabierna cu Diasabra awor:

Salubridad Publico y PAHO cu tayer di trabao riba situacion di Parkietenbos

ORANJESTAD (AAN) -- Departamento di Salud Publico ta traha den colaboracion estrecho cu Panamerican Health Organization, esta PAHO, cual ta e instancia cu ta representa nos region pa Organizacion Mundial di Salud.

Den e contexto aki, señora Cherryldine Muller, Relacionista Publico di Departamento di Salud a comenta pa DIARIO, cu den tres ocasion, den e transcurso di aña 2000, PAHO a pone enfasis riba e peligro cu e dump di Parkietenbos ta representa pa salud di nos pueblo.

Den e transcurso di e aña aki hopi a ser discuti riba ki decision ta bay worde tuma, mientras cu gruponan ambientalista a vocifera riba e situacion aki, mientras otro gruponan no tabata di acuerdo pa e dump worde traslada pa Palo Marga, loke a ser propone pero no ta un opcion mas, y asina e preocupacion a keda durante aña 2000 pa falta di un consenso.

TAYER

DI TRABAO:

Sra. Muller a splica cu di parti

di Salubridad Publico nan ta organizando un tayer di trabao diabierna y diasabra awor, unda lo tin como invitadonan e fundacionnan cu ta traha riba medio ambiente y salud ambiental.

Expectativa ta pa conhuntamente cu un miembro di PAHO, funcionarionan di Salud Publico por scucha e gruponan aki, cu e meta di traha riba un plan conhunto.

Alomenos e deseo ta pa yega na un acuerdo caminda cu por tuma un solucion pa Parkietenbos, cu no solamente Departamento di Salud pero henter nos comunidad keda satisfecho y por biba cune.

ESPACIO TA CABANDO:

Sra. Cherryldine Muller a señala cu e situacion na Parkietenbos ta preocupante, y actualmente e dump ta asina satura cu aki un par di luna lo no tin espacio mas pa hiba sushi.

Yega na un solucion y traha riba e mesun linea di pensamiento ta un mester, y mirando cu e salud di nos pueblo ta na peligro debi na e dump

aki, Salubridad Publico ta hayando indicacionnan for di funcionarionan di PAHO cu mester busca solucion y yega na un acuerdo mas rapido posible.

PA YEGA NA UN PENSAMENTO COMUN:

Den e cuadro di esaki e Departamento di Salud a bin cu e iniciativa di e tayernan di trabao invitando e fundacionnan concerni cu medio ambiente.

Diabierna cu diasabra ta dos dia completamente dedica na e problema di Parkietenbos, y ideal ta si pa diasabra atardi lo por yega na un consenso unda cu despues por presenta e plan cerca gobierno pa resolve e situacion menciona mas lige posible.

Cherryldine a comenta cu solucionnan tin varios y cu varios plan y programanan a worde presenta y guia pa diferente instancia, manera: Vrom, Serlimar, Aruba Bunita, Camara di Comercio, Asociacion di Comerciante di San Nicolas y Fundacionnan Ambientalista, pero sin logra un consenso general.

E fundacionnan ta bisa cu nan tambe kier participa y yuda pensa ya cu tin hopi experticia den nan organizacion encunto personanan cu tin preparacion y conocimiento riba con mester maneha

sushi.

Pesey nan a worde invita pa sinta hunto cu funcionarionan di Salubridad Publico y e miembro di PAHO, pa trata di yega na un acuerdo riba un pensamiento comun y asina soluciona e problema.

Sra. Cherraldine Muller a acentua cu mas tempo pasa mas tempo perdi, y enberdad Salubridad Publico ta preocupa cu e salud di nos comunidad no por bay a costo di decisionnan y proyectonan cu no ta worde treci dilanti, of termina.